

Proton: Jangan jual kepada syarikat asing

SHAH ALAM 15 Dis. - Penasihat Proton Holdings Bhd. (Proton), Tun Dr. Mahathir Mohamad mahu pegangan saham syarikat pengeluar kereta nasional itu tidak dijual kepada syarikat asing.

Bekas Perdana Menteri itu berkata, saranan tersebut perlu diteliti oleh Khazanah Nasional Bhd. (Khazanah) kerana penjualan pegangan syarikat itu kepada syarikat asing dilihat tidak selari dengan matlamat Proton yang merupakan projek kereta nasional.

"Penjualan saham (Proton) melalui bidaan terbuka, Khazanah perlu membuat penilaian yang terbaik. Apa yang penting bagi saya ialah Proton harus lakukan yang terbaik selepas ini.

"Proton adalah projek kereta nasional dan saya rasa kita tidak perlu jual pegangan (saham Proton) kepada syarikat asing. Mungkin syarikat asing boleh terlibat melalui kerjasama tertentu bukan menguasai pegangan dalam Proton," katanya kepada pemberita di Bukit Kemuning, di sini hari ini.

Pada 13 Disember lalu, sebuah syarikat konglomerat tempatan, DRB-Hicom Bhd. (DRB-Hicom) telah menyatakan harapan agar Khazanah menerima syarikat itu sebagai calon yang

sesuai untuk digandingkan dengan Proton kerana kehadiran pengeluar kereta nasional itu akan menjana sinergi yang gah dan memampukannya di peringkat serantau.

Bagaimanapun, Pengarah Urusan Kumpulan DRB-Hicom, Datuk Seri Mohd. Khamil Jamil sebelum ini menyatakan pihaknya tidak mengetahui atau diberitahu sebarang perkembangan berkaitan hasrat Khazanah untuk melupuskan pegangan mereka dalam Proton.

Dalam perkembangan lain, Dr. Mahathir ketika mengulas mengenai projek Projek My Transit Aliran Massa (MyMRT) berkata, tumpuan yang sama harus berikan oleh pihak kerajaan terhadap syarikat-syarikat tempatan dalam projek pembinaan itu.

Katanya, pemberian kepada syarikat tempatan dalam projek tersebut dilihat mampu memberikan manfaat dari segi perolehan pengetahuan dalam bidang kejuruteraan termasuklah pembinaan terowong yang mana tidak ada banyak negara mempunyai kemampuan dalam bidang berkenaan.

"Terpulang kepada kerajaan untuk menentukan (syarikat mana yang layak), tapi saya rasa lebih baik ia dilakukan oleh syarikat tempatan," ujarnya.



DR. MAHATHIR Mohamad (kanan) menandatangani plak menandakan perasmian Akademi Latihan Penerowongan MMC-Gamuda di Kota Kemuning, Shah Alam, semalam.